



RVtgerus apud Belgas natus, & optimè in literarum studio educatus est. Cum autè is prima artium fundamenta percepisset, se à Louaniensem Academiam cōtulit, & linguæ Græcæ & Latinæ præclaram operam nauauit. In ijs quoque ob ingenij foelicitatem ad eò profecit, ut publicus Græcæ linguæ professor Louanij in nouo Buslidiano collegio constitueretur. Eam professionem is magna laude peregit, atque inter alios Erasmo Roterodamo gratissimus fuit. Vnde de eo ita ad Bernhardum Buchonem Phrysiū scriptum reliquit: Est Rutgerus Reschius Græcæ linguæ professor in collegio nouo, quod instituit Hieronymus Buslidius,

qui doctrinam non uulgarem incredibili quadam modestia, planeq; pudore quodam uirgineo cōdecorat. Itaq; Rutgerus suis uirtutibus effecit, ut non modò sui seculi hominibus, uerùm etiam posteritati innotuerit. Eras. lib. 17 Epistolarum.